


叢書集成續編

一七五

新文豐出版公司印行

叢書集成續編 第一七五冊目錄

文學類



詩別集——清

賜硯堂詩稿四卷附補遺一卷·····	清	許賀來撰	雲南	一
含中集五卷附含中隄集兩集校錄一卷·····	清	李鎔撰	遼海	六一
現成話一卷·····	清	羅品撰	四明	一一五
留硯堂詩鈔六卷·····	清	張漢撰	雲南	一三九
岳容齋詩集四卷·····	清	岳鍾琪撰	古棠書屋	三二一
樊榭山房集外詩一卷·····	清	厲鶚撰	觀自得齋	三四三
南村詩集八卷·····	清	孫鵬撰	雲南	三六三
芋栗園遺詩二卷·····	清	朱奕簪撰	雲南	四三一
慶芝堂詩集十八卷·····	清	戴亨撰	遼海	四五一
十憶詩一卷附吳山夫先生(玉搢)年譜一卷·····	清	吳玉搢撰	雪堂	五六一
十美詩一卷·····	清	鮑皋撰	香豔	五七五
雪村編年詩牘十二卷·····	清	戴瀚撰	金陵叢書	五七九
捫腹齋詩鈔四卷詩餘二卷·····	清	張宗松撰	涉園	六八九
藏密詩鈔五卷·····	清	傅爲許撰	雲南	七四一

雲南叢書集部之十九

賜硯堂詩稿

共四卷又補遺一卷

雲南圖書館藏板

甲寅
年刊

秀山太史公前清康熙甲子補行雲南辛酉鄉薦乙丑
捷南宮選庶常清朝滇南詞林之選自公爲翰林授編
修歷官侍講聖眷優隆癸酉奉命纂修明史朱子語類
唐類函等書召入直乾清宮南書房時常蒙聖祖恩賜
御書臨董臨米字幅御製詩扇詩文集道德仁義匾額
松花石硯宮紵寶鈔等物公平日著有紀恩詩一卷輦
下集二卷松蔭堂賦集四卷授諸剏廟行于世南歸集
二卷山中集八卷賜硯堂詩古文集十卷纂有中州集
二卷甬上耆舊詩二卷周山集二卷明詩選四卷古學
集錄十卷讀史輯要四卷性理釋言二卷省克錄三卷
賜硯堂詩序

山居筆記一卷藏於家因遭回祿所有家藏太史之書
化爲灰燼誠可惜也茲僅存賜硯堂詩集殘稿一卷謹
摘鈔寄數十首以備採選云爾十世孫化鵬謹序

序

許燕公先生以弱冠之年來自滇南萬里連捷禮闈讀
書中秘予忝隨同館後入則授簡內廷出則聯牀邸寓
燕公輒揮毫落紙脫草擅場同人往往誦服常與予論
詩謂當以用意爲主意有不屬徒取掇拾填綴儼葉駢
枝不過名士欺人語耳於是屏除一切獨標慧想卽當
前之景事寫意中所欲言無事矜奇索奧而時時有一
股靈氣往來楮墨之間間亦旁徵典故含芳漱潤要如
風水相遭波瀾漪瀾自然成文所謂初日芙蓉非鋪錦
列繡比也書曰詩言志莊周曰詩以道性情燕公自通
賜硯堂詩序

籍以來雖置身清華晉歷宮詹而閉門却掃嗜讀耽吟
不改儒生寒素若乃侍從承明應制紀恩惟是一片丹
誠依依闕下而還念故鄉寥邈白雲在望子舍久虛則
又纏綿悱惻不能自已於懷蓋其澹泊寧靜之志溫柔
敦厚之情有動於中時發諸言其庶幾登風雅之林而
不謬乎古人論詩之旨者歟今燕公將請於朝告歸親
母兼所作命予序之予維滇南雖號僻遠而疆原悠衍
寒暑適中山川清淑之氣絕勝嶺徼諸邦從來採風者
僅以奇珍異產聞耳予度其地靈之所鬱積者當不止
是也自燕公詩卷出而後大雅人文迴爲蒼山洱水生

色望氣者且以爲彩雲復見南中矣

吉

康熙甲申歲七月既望豫章年眷弟梅之珩頓首拜題

賜硯堂詩

序

二

序

余寡鄙不文於聲韻尤拙每逢詞宗詩伯輒歎踣流汗恥不列於人人以是少我乙酉春解組將歸過許秀山乃謂予曰吾二十載京師積吟咏若干首請爲我序之以明所志予謂秀山過矣有士安之才然後可重三都有休文之鑒然後可觀雕龍余則何人敢以莛莛者言取誦君子哉因輟筆辭不能已而思之秀山之詩非余所敢序也然與秀山同譜二十年矣友朋相愛之情秀山高舉之槩實有異於人者若不爲挖揚休美非所以尊鴻藝敦好德也謹卽所見而述之曰詩以言志志必

賜硯堂詩

序

一

有所宗宗必在古人而不在近今之人今之爲詩者動擬李杜或王孟或高岑韓柳人亦羣然奉之而考其所至不逮古人遠甚豈人才不相及哉抑思古之能詩者其胸中何如哉其志潔其行修漠然不求聞於世潛心載籍數十年或醞於六藝或枕藉於騷選反之復之由之繹之得乎中者旣久夫是以一發之聲律而神情周備宮商和諧也今之能如古人者有幾其胸中固未可問也秀山弱冠成進士讀書東觀未嘗以才先人在京不賃屋僻僑滇之邸館杜門稽古屏謝人事所交皆淡而無華者華者亦不至秀山之舍惟惓惓至性之士

慕秀山而樂與相親以是精專統一浸淫漢魏三唐諸
大家而探奇討奧窺其存心在陶韋之間而聲調借錢
劉比次昔柳子厚評韓退之文雄深雅健人以爲知言
余亦評秀山之詩曰朗湛秀洽夫朗則能澈湛則能深
秀則美而潤洽則工而穩胸中不愧古人且服膺於古
者甚厚可卓然自成一集也觀者其以余言爲然乎抑
尙未盡耶余旣歸秀山亦有退轍之想夫士固思自樹
立也易曰君子之道或出或處或默或語使古今聲名
盡在廟堂則山林無人盡在山林則廟堂無人而藉之
史冊蓋兩耀焉然則出者不必譏處者之忘世處者不

賜硯堂詩

序

二

必嘲出者之戀名與其悠悠廟堂靡所建明則又不如
反吾田廬安吾耕鑿以其暇日搜遺文於簡編抽餘緒
於前賢由其所見著成一書或一言幾於道尙於此生
無負也秀山知道者序其詩并以是質之

康熙四十四年三月上浣年眷弟晉江陳遷鶴頓首拜
序

序

古之爲文者搜天幹地籠百態自經傳列史以及諸
子百氏之書靡不研窮融貫本乎至性機神湊合而後
落筆自成一派直若昔之所得一無用焉非盡掃除也
蓋天地萬物之會歸而經傳子史之精髓所萃積而獨
秀於兩間者也不獨爲文咏詩亦若是耳故時而鼓吹
太平颺言庠命見性情之正卽嬉笑怒罵亦無違於道
劉賓客集云片言可以明百意坐馳可以役萬景黃山
谷曰此事要須從治心養性中來濟以學古之功此深
於論交卽於咏詩者秀山先生滇屏華族自司馬可

賜硯堂詩

序

一

泉公以詩教屏人遂以是世其家忘分而與予交且至
密焉每見其循循孝友胸次脩然塵滓不得而入善讀
古家窘而不思遷處亂而不知變似得古人意趣深入
而不知返者然故五車四庫自冲年而腹已果謂予曰
吾昔怒之惟恐不多今欲化之惟恐不速能破萬卷卽
其善用萬卷者矣是以居吏館及卧林下歲各久而應
制諸章林泉嘯咏皆和而不流淡而雅文而得中卽慷
慨悲歌亦無乖於氣詩門千萬而獨不踣附自爲翕闢
是卽所云大音希聲也張敞謂心之精微口不能言言
之微妙書不能文而先生皆能言之皆能書之豈止與

目下名公爭伯仲哉先生所著賜硯堂詩十卷嗣君自
文若瀾師亮不敢私諸室黎棗用光以揚父美仁孝之
徵也然而先生美自難藏囊中應有知己鮑江吳孔文
中子以爲狂狷獨取之杜工部得王介甫而舉世知宗
則賞先生之奇而依爲性命者其文中子王介甫之後
身乎其或他人不能曉而鮑江吳孔杜工部復起自知
而自賞乎余不揣固陋而爲之序

雍正乙巳年嘉平月同學弟塗暉題于昆明學舍

賜硯堂詩

序

二

序

士大夫林泉閒居吟弄篇詠必有江湖魏闕之誠而後
其詩沉鬱而篤摯必有永言不匱之隱而後其詩徘徊
而纏綿必有搜奇弔古之懷而後其詩雅麗而典核必
有嗜遐遺榮之致而後其詩恬淡而冲和反是則浮僞
而已矣淺俗而已矣怨悱暴戾而已矣故讀其詩即可
知其其人而識其人蓋可以知其詩未有舍真性情而
能工言語者也石屏許太史秀山本司馬公之後兄弟
以科名濟美惟滇南華陽乙丑秀山登進士選入翰林
戊辰分校禮闈首薦者爲吾鄉沈子恪庭餘皆知名之

賜硯堂詩

序

一

士其蟬均紀事瀛洲倡和之作久已哀集梓行乙酉省
親還里遂杜門不出因綜十餘年家居之詩郵寄恪庭
斟酌繁簡編次若干首以余一日之長殷殷問序余得
展卷縱觀知其感君恩則鄭重泐書寶硯之錫慶聖節
則瞻望衣冠閭閻之遙詩之沉鬱篤摯者有焉思嚴親
則時深霜露松楸之痛念慈母則日動江魚竹筍之悲
詩之徘徊纏綿者有焉以及登晴川黃鶴而題句遊普
陀昆明而詠歌莫不雅麗典核也春興圖居之自述昆
蟲草木之寄托莫不恬淡冲和也斯豈浮僞淺俗怨悱
暴戾者可幾一二乎余少壯迄老鹿鹿朝參家居未嘗

煖席歸田之詩絕少年來奉命編纂鉛槧餘暇間有漫興亦未合於作者讀秀山之詩而滋愧焉至秀山又在萬里之外賞奇嘶疑更無其人徒手是編臨風懷友余益有感矣

康熙戊戌三月下泮華亭年通家生王鴻緒題于長安邸舍

賜硯堂詩

序

家傳

滇南爲禹貢梁州之境越巂石砮載之夏書而人物之著從漢司馬中郎將槎山通道盛覽張叔首撫衣稱弟子東都如許叔重之經學尹珍擔簦請業北方學者莫之或先厥後六詔中阻髦士隔絕中原少有知者勝國混一天南遂庵少師以文章老宿與茶陵敲手於是中孚禺山將翼新都擬諸大峨君六學士之選瀾滄禺同之秀遂與碧雞金馬磅礴迸出而區區叩竹茹醬諸種降爲凡品是亦可以見風氣之日開也以予目中所見如前輩玉峯少宰不媿人倫之望而李中丞發甲以吏

賜硯堂詩

傳

治有聲同年許先生燕公則篤學卓行君子也方予與先生同成進士一榜中環奇岸偉之士不一而足先生爲最年少風流蘊藉傾倒一座負館閣之重名而早自引去不爲威鳳之回翔而爲冥鴻之蜚遞令人望蒼山黑水如峨眉六月之雪天半崢嶸稽之在昔右軍之誓暮淡威之勇退未爲獨步也年來余顛毛種種八十餘生伏念聖天子委寄之隆不敢以髦爲辭回顧昔年同岑兄弟零落殆盡州來之劍山陽之笛未嘗不驚心動魄噩夢旁皇會先生嗣子澣請予作其家傳因念先生素履直接古人予雖筆力衰退猶當節略一二以爲他

日史傳底本不以文之工否計也先生名賀來字燕公
秀山其別號也雲南石屏州人以康熙辛酉賢書乙丑
登第出盛侍御符升門我朝滇雲之選庶常者從先生
始大司寇崑山徐公相國安溪李公時方掌三館事亟
稱先生詩古文辭散館授編修戊辰分校春闈所得多
知名士是年以覃恩得封贈遂請十旬假歸省太孺人
卽欲終侍養不出會臺臣以詞苑多曠員上言部檄催
就道癸酉冬再赴都補官聖祖仁皇帝萬幾之餘加意
文學命詞臣輪班入直乾清宮西煖閣就御前給筆札
面試先生濡毫染翰輒蒙溫旨褒賞論者以爲稽古之
賜硯堂詩

傳

二

榮尋充日講起居注官擢右春坊左右贊善陞侍講望
益重名益高優游館閣卽可躋開府列九棘而先生以
太孺人八秩陔南遠望雲興歎拂衣竟歸是年分遣
督學先生名在首選有留之者先生笑弗應也歸而築
室普陀岩下菽水養志太孺人謝世哀悃逾于常禮服
除竟不起補今天子御極在籍諸臣相繼起用先生杜
門著述無復宦情諸子相繼上公車祇以讀書植品爲
言乘時倖進爲戒先生雖高卧乎而東山令望遍滿寰
區三省諸公猶望先生一出以展厥蘊乙巳之夏龍蛇
告識當年未七十也先生文章之盛當居三不朽之一

著書十五種藏于家玉峰少宰之卒兩喪停滯先生委
曲措置遣人護歸當時歎其篤行嘗謂益部東西石屏
實甲千里之內邇來甲科文物燕躍鵲踊而出况有宿
德醇儒如先生者弁冕其間方將爭雄長於古人若僅
以錦里先賢襄陽耆舊相爲位置抑末矣雍正十年歲
在壬子嘉平旣望賜進士及第誥授光祿大夫文淵閣
大學士兼禮部尙書加三級浙西年眷弟陳元龍頓首
拜撰

賜硯堂詩

傳

三

跋

吾屏號詩人淵藪月槎琴山丹木五塘筱園其著者而
 秀山先生開厥先先生詩藁富會刻賜硯堂集集中有
 康熙癸未正月三日侍直南齋蒙恩賜硯詩蓋堂之所
 由名也集凡十卷余僅見其四求之于家姊丈義軒孝
 廉復得抄本二巨冊皆先生未刻稿有許映垣跋道光
 懷綸處獲見侍講公親筆原稿因較對補錄之余年七
 十有二矣老眼昏花字畫模糊所幸者侍講公遺詩得
 此本其全孝廉者先生裔孫也選未刻稿數十首殊不
 及原刻詩之工因其罕傳定爲補遺一卷合而刻之先
 生早入承明中歲歸林下文采風流照耀今昔所著書
 賜硯堂詩跋

僅刻詩集猶不獲盡傳于後世名山之業艱乃如此豈
 不令文人增感喟也哉顯世運銷沈滄桑幾易五卷詩
 雖區區乎而勝于世變焉有奚啻倍蓰讀先生之詩者
 夫亦可以自壯矣丁巳春日石屏袁嘉穀跋于滇省移
 山簪

賜硯堂詩藁目錄一

- 卷之一詩共五十九首
- 卷之二詩共一百二十三首
- 卷之三詩共一百九十二首
- 卷之四詩共八十七首
- 卷之五詩共九十一首
- 卷之六詩共八十九首
- 卷之七詩共一百二十三首
- 卷之八詩共七十七首
- 卷之九詩共五十六首
- 卷之十詩共一百一十八首

賜硯堂詩目錄

藁目錄終

賜硯堂詩集卷之一

雲南叢書集部之十九

紀恩集

右屏許賀來秀出著

乙丑五月初一日引見保和殿蒙欽授翰林院庶

吉士恭紀

十年聲教阻遐荒驚被新恩上玉堂

時吳逆初平滇南翰林之選自是科

始清問垂時顏色喜彩毫題處姓從香

與選者皆身依御筆書名

霄漢渾疑夢訓出絲言永不忘

親聞天語訓勉拜首堯堦殊悚

惕草茅何以答君王

丁卯十月初一日御試體仁閣蒙恩特授編修恭

紀

賜硯堂詩

卷之一

旭日融和應小春班聯玉笋拜楓宸妍媸品莫淆宸鑒

甲乙分仍戴帝仁

試卷分爲三等皆上親定

方幸含香叨粉署旋驚

珥筆拔詞臣

余卷已定部屬上復細閱特拔編修

鶴鶴也得隨威鳳泰

荷殊恩注遠人

戊辰禮闈卽事和崑山夫子韻二首

柳花浪煖棘闈開額俊欣承帝簡來元老虛衷眞吐握

清脚明鑑絕塵埃春風入座翻書帙夜月侵簾照酒杯

回首三年辛辛在忍教榜下嘆遺才

文光夜燦聚奎堂列坐依然弟子行一代人材歸藻鑑

千秋大業在文章已知北闕虛前席會見南金耀上方

握槩冰兢隨哲匠盟心不用更焚香

元旦早朝

鳳曆更新慶履端鳴珂曉漏謁金鑾條風拂仗搖春已

炬火薰天散夜寒貢集梯航朝萬國香飄劍珮擁千官

閒身得傍金門隱帝德如春報稱難

雪後早朝

丹宸積素淨塵囂星斗低空影淡搖無月光偏明萬戶

未春花已綴千條樓頭曙促鳴鴉亂殿下寒侵仗馬驕

青瑣從容人退食一時軒騎踏瓊瑤

秋日早朝

賜硯堂詩

卷之一

曙色蒼茫夜欲闌彤墀趨謁珮珊珊流雲送月秋光淡

湛露含風曉氣寒鼓角城頭聲正急星河殿角影初殘

御香滿袖歸青瑣染翰朝朝愧素餐

中秋早朝

曉報雞人入禁扉冷冷仙掌露侵衣鐘鳴御苑鴉初語

星斂高天鵲正飛秋色平分三殿露晨光漸映五雲微

遙知御帳宸遊處千里關山共月輝

時駕出塞外

冬日早朝和孫子未檢討韻

迢迢禁闕漏聲清樓角蒼茫北斗橫雪積渾疑殘月白

風微乍覺曉寒輕星霜五夜催華髮萍梗一官托望明

朝罷不須愁寂寞詞文尊酒適閒情

頌曆恭紀

雲擁瑤簫下紫宸鵷班又慶歲華新千年禹貢遵時憲
十月堯蓂應小春寒暑氣均知敬授口星躔順仰寅賓
幾回拜賜君恩渥空負駒光慚侍臣

清明後一日直廬對雪和勵近公前輩韻

滕六花光透紫冥春深何事尙飄零寒侵社燕飛無力
氣逼林鶯語暫停落處頓迷宮草綠映來好閱簡編青
退朝莫歎厨烟冷已飽瓊饌出帝廷

康熙三十三年特恩蠲免川廣雲貴四省錢糧恭

賜硯堂詩

卷之一

三

紀

宸極勤民日深宮宵旰時入荒勞軫念五夜警疇咨聲
教流窮髮痼痼切察詹十行雞唱下尺一鳳脚馳禹貢
荆梁域星分并鬼陲五溪盤地曲三峽插天奇邛水通
諸洞崑州總百彝懸繩嗟異俗卉服憫窮黎火耨刀耕
瘠金砂白塔疲機槍消粵嶺烽火靖滇池糧糗輸將急
舟車輓運隨雲霓羣引望雨露每相期幸矣時逢泰休
哉日照離九天申渙汗四國被恩施粵蜀租庸緩滇黔
樂利貽錦江流不盡洱海澤無涯就日蠻花笑嬉春吃
鳥怡瘴烟成瑞靄簪雨發榮滋德沛天邊潤風欣微外

破茅檐欣鼓腹萬里樂雍熙

西苑勤政殿奉事應制

水殿珠簾靜龍池柳色勻薰風飄錦瑟甘雨浥輕塵肝
食憂勤切封章獻納頻有恩皆下逮非道不前陳主聖
臣常直時清化自淳廷寮看濟濟拜手荷陶甄

召試豐澤園蒙恩賜譙恭紀

橐筆入瀛臺新晴曙色開鑾輿天上轉鳳艦島中來香
細荷迎棹陰濃柳覆苔風應崇樸素水榭淨塵埃儉德
師神禹農功重有邵稻畦連竹逕鹽舍傍亭隈觀稼勤
民事校文出睿裁花間排硯席樹底酌尊罍幽檻臨風

賜硯堂詩

卷之一

四

轉圓池玉鏡洞詩成叨顧問酒罷許徘徊珍饌中官捧
綺筵元老陪敢誇稽古力忝竊侍臣才

乙亥二月上旬上丁奉命分獻孔廟恭紀

乘春崇報祀執事入成均夾道松陰古侵墻草甲新泰
璋宜聖主主聖肅肅臣早遂升堂願宮牆禮聖人
稚牛享帝同秩禮重儒宗俎豆崇東魯人文盛辟雍春
星燈火輝庭樹燎烟濃簪佩千官集團橋聽鼓鐘
入廟瞻遺器升階憶兩楹齋心盟此日私淑本平生蘋
藻虔王獻肅韶奏九成班隨元宰後奔走有餘榮

恭讀御製咏史詩應制 附次韻

如淵聖學六經該經學通兼史學來評定行間垂日月
吟成筆底走風雷累朝制作歸宸鑒列后心傳大曆裁
捧誦天章滋警惕臨叨珥筆愧非才

賦得金蓮花應制

限齊韻

驚嶺移佳種榮分禁苑西靈根欣近日正色不濡泥風
過流香細雲來覆影低栽培深雨露未許累芳齊

賦得虛心高節雪霜中應制

限文韻

翠竹亭亭迥不羣霜欺雪壓自繽紛常留勁節凌寒歲
肯遣虛心受俗氛實結瑤林儲鳳食根抽玉笋展龍文
雕欄水檻滋培久博得清標拂五雲

賜硯堂詩

卷之一

五

聖武神功詩一百韻

有序

欽惟皇上備聰明睿智之姿兼神聖文武之德
恩威翔洽於徼外聲教普被於寰中平瀆黔平
陶粵入欽廟算無遺定隴蜀定澎臺共仰神謀
獨運雕題鑿齒之地就日輸琛禮表并服之鄉
占風納貝獨厄爾特之部落有噶爾丹之兇頑
擾虐鄰邦稱兵漠北邊民受其荼毒內懷憤懣
憑陵雖諭旨屢頒許以更新而悔禍柰窮荒負
固依然怙舊以行私昏暴出於性生怨聲塞乎
邊域蚩尤作霧難逃黃帝之誅有苗逆天遂觸

宸廷之怒歲在丙子時維仲春親總六師長驅

萬里北迎玉勒柳拂瑞戈旌旄翻紫塞之雲鐙

甲耀黃沙之百龍韜豹畧半皆六郡雄才虎視

鷹揚盡屬五陵俠士於是雨暘協應川嶽效靈

天山之豁谷陰消風和雪霽瀚海之積沙氣暖

草細泉甘猶且動軫皇情常紆帝念遣大臣以

督輓運撤御饌以勞烝徒布陣列營悉稟九重

節制分兵扼要時煩五位圖維俄聞偵謀之言

遂定攻圍之計拖諾山畔旗影迷天魯倫河邊

笳聲震地兇徒聞而膽落醜類見以心驚如竄

賜硯堂詩

卷之一

六

鼠以偷生類奔猿而走死方當北遁適遇西師
分左右以交攻衝中堅而轉戰釜底之游魂頓
散刀頭之遺孽服誅妻孥盡被生擒逆渠僅以
身免然而宵衣旰食猶復遠慮深謀謂首惡弗
除仍爲蒙古之患世隅未靖尙貽方夏之憂時
際嚴冬重臨邊塞弘施估冒曲示招來脅從衛
恩咸傾心而歸化渠魁畏罪亦齎奏以乞降乃
睿照如神久防免脫知賊踪似賊尙意鳴張是
誠構机之兇帝廷不赦共工之惡盛世難容者
矣頃當二月復駕六龍取次大同直趨寧夏緣

延城而攬轡指榆塞以飛旌青海黃河歷盡西
陲之險狼山駕水探來北地之奇閭閻拜舞以
獻靈漿童叟歌呼而留鑾轡追諸師之畢會授
方畧以前驅一子先已獻俘羣兇爲之縛面勢
窮力困徒顧影以倉皇膽碎魂消欲竄身而無
路自干眾憤竟服天誅部長率眾以輸誠族類
載尸而獻捷此皆乾剛獨斷運奇謀於五夜之
中故爾氛祲聿銷奏膚功於一年以內周宣之
伐獵抗尙屬遷延殷宗之克鬼方遜茲神速垂
贈金石寧誇孫武之書載在韜鈴不數陰符之

賜觀堂詩

卷之一

七

術臣賀來徒慙侍從莫効馳驅觀露布以神飛
聽饒歌而邑勳謹拜手稽首獻詩曰

聖主天心眷鶴圖景祚昌韓坤齊覆載山海接梯航文
教皆修舉武功時奮揚丕基貽列后大業振今皇民莫
勤宵旰宸修慮就將勳圖萬峻極德並海洋省勳幾
刑措蠲租免賦懸轡納諫牘側席選珪璋惕勵趨三
事都俞慶堂九域同奉朔入表盡來王濱海平藩逆
澎湖靖寇攘八知英畧異莫測聖謀詳泊已超殷夏切
寧敷漢唐靈寶潛蟠天輒敢驛鳴張弱國恣侵奪鄰封
任賊戕陰山憑險阻瀚海倚蒼茫妄意矜驍勇甘心停

典常皇恩弘怙冒勅諭戒錫江經爾居邊塞依然隸職
方一夫今肆虐列部應同傷但使輸琛貝何須用斧戕
生言頗懇懇聖度寬汪汪鷹眼終難化豹心未肯忘草
間時引弩馬上漫飛槍祇自櫻鋒鏑寧容聽陸梁天威
申這伐帝德切胥匡昨歲當春仲我師速啟行六飛臨
雁塞萬騎度龍荒羽蓋翻雲紫旌旗映日黃彎弧懸月
影舞劍耀星芒兇甲三千銳鐵衣十萬強雄才誇貫鼉
絕技妙穿楊所向知無敵前驅孰敢當山川爲助順風
雨默呈祥盡解黃堆凍頻回紫塞陽馬蹄侵草細沙磧
湧泉香千里輪囊囊六軍痔糧糧入旬期早定一路事

賜觀堂詩

卷之二

八

先防輜輶如雲集車徒度嶺忙材官胥踴躍宛馬飽騰
驤不避關山險遙臨沙漠場外藩迎道左部曲拜車傍
共觀天顏喜爭先士卒倡犒軍分饌食勞將解衣裳雨
雪恒同瘁苦甘與其營營屯親審願斥堠暗相望介冑
涸山無濕伏箭罔六師從地擁萬乘自大翔逆醜聞
聲遁
路西涉觸銳鋒焚巢餘器械夾道委牛羊因獸魂驚碎
傷禽勢窘惶捷書傳朔漠法駕返天間已見妖氛息還
欽磨算良籌邊憂未已除寇策彌長惡首仍逃匿民生
詎又康重令申節制復命肅軍裝列隊潛衝隘分兵早

扼吭彼師鋒已挫我旅力方剛十月凌寒雪三冬冒曉
霜旌飛魚海地聲度鴈門鄉潰黨皆銜壁渠魁亦拜章
神明燭狡詐漸積恐披猖性本同狐兔兇原類犬狼嚴
稜終作患草竊定爲殃赫馬白登下屯兵青海傍連天
看是陣積粟喜盈倉二月依楊柳九重駕驕驕虎賁騰
石口驚駭懸邊牆煦日龍旗麗和風豹尾颺衝寒過朔
塞冒暑出西涼已閱黃河險還看黑水決兒童環羽騎
父老獻壺漿邊事勞清問民依每細商胥山遙駐蹕帳
殿共稱觴諸道兵如虎元兇狀若虜力窮嗟踟躕眾叛
獨徬徨服罪寧須戮違天自取亡雛兒先面縛醜類半
賜覲堂詩

卷之一

九

尸僵塞外烽烟靜軍前草木芳一年消反側三出靖戎
羌功豈關方叔術非藉子房神靈真罕測智勇洵難量
五月回鑾駕三軍脫戰韉榴花明綺陌梅雨灑康莊舞
拜紛徒旅歡歌遍廟廊大哉昭聖武矣振乾綱威並
雷霆迅明同日月光膚功銘竹帛鴻禧載經綸尊號加
頻懇冲懷讓未遑恩綸新誕布禮典盛輝煌俎豆虔宗
廟圭璜薦昊蒼于宮容祇肅六樂響鏗鏘中外歡無已
神人賴有慶戈殺絕虎士甲解羽林郎帝念知方慰天
休正未大太和調玉燭佳氣擁金湯七政齊經緯三時
協雨暘普天歌耆定膺服慶無疆

雪中早朝

銀漢光搖鳳闕寒瑞華踏處擁千官驚添樹色傳春信
誤引雞聲唱夜闌柳絮隨風翻玉仗梨花帶雨落朝冠
東郊此日田盈玉豐稔爭看萬姓歡

東華門迎駕恭紀

鑾回山海雪初晴塵淨東華夜氣清禁禦風寒人少語
御河冰凍水無聲浦中父老留天仗塞外山川軫聖情
特布綸音蠲賦稅豫遊是處慶生成

新正上辛日上新穀南郊瑞雪奉應恭紀

宵旰精誠與帝通方春瑞雪灑郊宮貂衣半帶梨花雨
賜覲堂詩

卷之一

十

鳳蓋輕颺柳絮風納稼三秋祈歲始齋心五夜重農功
鑾回共覩天顏喜早卜豐年萬井同

賦得芳氣有無中應制

幽芳何處發隱隱氣微侵乍向風邊覺難從檻外尋爭
香寧有意闌色似無心何事拾遺老花開獨廢吟

賦得四方無事太平年應制

帝德日新法健乾雍熙至治邁黃顓祥開銀甕兼珠斗
民在無懷與葛天甘甫和風滋草木卿雲麗日映山川
精勤猶自勞宵旰海宇昇平慶萬年

恭讀御製白燕低飛喜惠風應制

芹香社日正泥融喜見雪衣舞惠風翅拂柳絲微映綠
喙黏花蕊乍添紅斜穿玉砌流霜影低傍雕欄點蕙叢
興寄陽春舒瘡藻物情宛在詠吟中

元旦早朝

春星爛熳麗天繁劍佩凝霜謁至尊斗轉蒼龍新歲籥
樽開白獸飫君恩雪融宮樹潛消凍風散爐煙已帶溫
望裏紅雲雙闕擁鳳城春色霽千門

賦得春雲處處生應制

青陽開麗景山澤見雲生觸石形方動翻空影自清
氤隨日暖縹緲帶煙輕天外歸鴻度松間舞鶴迎高連

賜觀堂詩

卷之一

七

青嶂靄低覆綠波平欲雨因風散如霞送曉晴霏微千
里暎爛熳九霄明瑞氣蓬萊繞祥光遶岫橫翠添春樹
色望協野人情會見濃陰合爲霖潤八紘

賦得迎春先有好風光

陽和回大地玉律轉鴻鈞朔氣方過臘晴光已兆春
葭灰催令節雲物報芳辰煙暖微侵柳池融欲綻蘋宮梅
迎雪動隴麥帶霜勻解節禽初暢爭榮草漸新寒消吹
黍谷歡動負暄民乍覺嚴陰散從知淑氣伸登臺熙蔭
屋就日喜簪紳共慶風光早當陽有聖人

賦得蘆花映釣船應制

簑笠江干客生涯寄釣船停家依荻浦鼓棹泛蘆邊
外花相映竿頭色正妍依稀寒雪覆浩蕩白雲連鷺立
光交動鷗栖影共懸綸垂明月夜人在曉霜天柳岸還
沽酒葭洲自扣舷炊香風裏度夢冷雨中眠舟楫爲經
濟煙波老歲年憑誰揮彩筆寫作畫圖傳

賦得江路野梅香應制

澤畔梅邊路橫斜領眾芳數株流冷豔幾片漏春光
映水全含秀迎風暗送香江頭堆玉白柳際闌金黃冰骨
偏宜雪瓊英詎畏霜低枝茅屋外瘦影竹籬旁氣馥侵
漁艇花飛點客裝村煙添綽約溪月照琳瑯折處憑詩

賜觀堂詩

卷之一

三

寄尋來帶酒嘗待看調鼎日儲實獻巖廊

賦得月傍九霄多應制

三五團圓月丹霄分外明垂輝先北闕委照逮西清
玉砌花陰合瓊窻樹影橫空涼涵太乙皎潔澈蓬瀛雲外
峰痕動枝頭鳥夢驚露盤全映掌宮漏靜流聲對酒看
侵戶攤書愛滿盤樓臺同畫明砧杵擣宵晴皓彩歸鸞
披餘光靄鳳城侍臣親切地夙夜自含情

恭讀御製鳴禽對對繞芳叢應制

園林花滿景初融早有鳴禽戀錦叢對語枝頭歌麗日
雙飛葉底弄和風參差芳樹晴烟外上下流鶯御苑中